

AKASHVANI AIZAWL

REGIONAL NEWS BULLETIN

Date – 02/03/2026 Time - 18:30 -18:40Hrs

HEADLINES ( EVENING )

- Chief Minister Pu Lalduhoman Mizorama district tinte chu an District Plan a taka an kalpuina tur cheng vaibelchhe khat theuh vawiin khan a sem.
- Mizo National Front (MNF) in zalenna an sual kum 60 na chu vawiin khan Mizoram hmun hrang hrangah uar takin an hmang.
- MPCC President Pu Lal Thanzarnan Sairang rel station a bazar nî siam tum chu 'hnamdang sumdawnna nî' siamna tur a ni ati.
- Falkawna ZMC damdawiinah Chibawm bâwk kg 33 vela rit zai a ni a, hei hi ZMCH-a zai tawhah chuan lian ber leh a rit ber nia hriat a ni.

<><><>

CM

Chief Minister Pu Lalduhoman District Catalytic Intervention Plan Fund vawiin khan a sem a, Mizorama district tinte chu an District Plan a taka an kalpuina tur cheng vaibelchhe khat theuh pek an ni.

Thu sawiin Chief Minister chuan, tun hmain District Planning Committee chu din a lo ni tawh a, meeting te pawh an nei ve thin a. Nimahsela, an district plan te a taka an kalpuina tur fund pek an nei ngai lova. An ruahmannate a takin an kalpui thei thin lo a ti a. An sorkar chuan an district-ten hma an sawnna tura anmahni ngeiin plan an nei leh chumi ti hlawhtling tura sum leh pai pek ngei theih an duh a, a bul kan tan ta a, an flagship scheme Bana Kaih tihhlawhtlinna pakhat a ni, a ti a.

A enzuina kawngah DC te thuneihna sang tak pek an ni tih sawiin project proposal pawh DC te bultuma siam a ni bawk a. He fund a hlawhtlin theih nan hian kan DC ten mawhphruhna pawimawh tak an chelh a ni. A bul an han tan ang a, an hman that viau chuan a dang pawh la pek chhuah zel theih tura duan a ni a ti.

Chief Minister hian Bank Cheque -in fund te hi a hlan a ni.

Planning Commissioner Pu Vanlaldina Fanai Planning pawhin thusawiin, hetianga DC ten an district hmasawanna tura an hmalakna atana pawisa a pek tum khatna a ni a. A lawmawmin hmasawanna chhinchhiahtlak tak a ni, a ti.

Deputy Commissioner te aiawha thusawitu Aizawl DC Pu Lalhriatpuia chuan District ten project an neihte chu Mizoram District Transformation Programme

zulzuia kalpui vek a nih thu a sawi a. Scheme dang nena kaikawp zawnga kal an awm baw k a. Sorkarin hetiang a hmalakna tur fund a pe chu an lawmin an phur hle a ni, a ti.

He Fund hi Handholding Scheme Component 5 na, Decentralised Plan hnuai pek an ni a, an pawisa dawn zaa 10 hi Admin Fund atana hman theih a ni ang a. An thawh that dan a zir zela la pek belh zel tur a ni.

<><><>

MNF 60 YRS

Mizo National Front (MNF) in zalenna an sual kum 60 na chu vawiin khan Mizoram hmun hrang hrangah uar takin an hmang a,

Mizoram Independence Puan kum 60-na 'Diamond Jubilee' lawmna pui ber chu Aizawl Vanapa Hall-ah neih a ni a, MNF President Pu Zoramthanga chuan thusawiin Kum 1961-a din MNF-in kum 65 hmel a hmuh ang chu movement dangin an tih ve theih loh, Pathian remfel ang thlapa kal a ni, a ti a. Pathian chuan MNF chu kawng lakah a kalsan dawn lo a, a hun a tihah a chawisang leh zel thin a ti.

Byte: Pu Zoramthanga

Pu Zoramthanga chuan kum 1947 August ni 15-a India-in British awpna hnuai atanga zalenna a chan hunlai khan Mizoram chu India ramah an awm tih hrelo tam tak an awm a, British sorkar chuan agreement sign leh ban phartirna pawh awm lovin Mizoram chu India-ah a awm tir ringawt a. Hei hi Pu Laldenga te chuan khatih hunlaia India Prime Minister Lal Bahadur Shastri hnenah thlenin, India chu Republic a nih a, Ram Danpui an siam lai khan Mizoram chu India siamnaah a tel ve loh avangin barh luih an ni an ti a ti a. India ramah an tel ve dawn a nih chuan Mizoram tana tha leh him tur an duh zawng sawi ve an duh thu an thlen a, hun a kal zel a, buaina a reh loh avangin kum 1966 March ni 1 khan Mizoram Independence puangin an inkap tan a ni a ti a. Kum 20 chhung an inkah hnuin kohhran, NGO leh pawl hrang hrang ngenna angin inremna entawntlak ber an nei ta tih sawiin, Mizo Hnam chu Pathianin a hruai zel ang a, rem a tih hunah Zalenna sang ber an neih hun a la herchhuah tir ngei a rin thu a sawi a ni.

MNF Sr Vice President Dr R. Lalthangliana chuan tun dinhmunah Mizoramah tualto Party dangin sorkarna siam mahse MNF chu Pathianin a hruai ang a, an la din chhuah leh ngei a ring tih sawiin, Pathianin MNF a hruai dan chu a mak hle a ti a, vawiinah pawh Mizoram Independence puan kum 60-na an hmang thei tih sawiin, MNF chu an tumah an chiang hle a, an la din chhuah ngei a rin thu leh Pathian pawhin MNF chu Mizoram hruai leh turin a duh a rin thu a sawi baw k a ni.

Byte: Dr R. Lalthangliana 2

MNF President Pu Zoramthanga chuan vawiin inkhawmah hian Mizo Hnam Runah Diamond Jubilee lungphun a hawng a ni.

Mizoram hmundangte ang bawkin, MNF Champhai North leh South Block te chuan Diamond Jubilee lawmna hun an hmang a, CHANEM complex a Martar te thlanmual a Diamond Jubilee Lungphun chu he hun hmanpuitu MLA, Pu Robert Romawia Royte, MNYF President ni baw k chuan a hawng a ni.

Mizoram in India ram atanga zalenna a sual kum 60 na hriatrengna Lungphun chu Mamit MNF Centre Block President Pu H Lalhlenglianana a hawng a ni.

Khawzawlah chuan Mizoram Independence puan kum 60-na chu Tuichang North Block MNF buatsaihin lawm a ni ai. He hun hi MNF General Headquarters Adviser Col. Lalrawnliana n a hmanpui a ni.

(Corr: Maremi & Hruaia/Hlua/Sangpuii PTC)



## MIZO MARRIAGE AMENDMENT BILL

Mizo Marriage & Inheritance Amendment Bill 2026 Assembly Budget Session kallai meka put luh chuan sawi zui a hlawh hle a, eptu party te chuan ennawn leh tha an tih thu an sawi a nio.

Kan corr report lo ngaithla ang.

VC : *Mizorama Congress Party President Pu Lal Thanzara chuan vawiin khan Aizawl-a an party Office Congress Bhavan ah thusawiin, 'The Mizo Marriage and Inheritance of Property (Amendment) Bill, 2026' Assembly House a pu luttu Chief Minister 'Sorkar tih a nilo' ti a NGO te pressure avanga bill pulut a nih thu a sawi ta daih chu mawhphurhna lak ngamloh vang a ni a ti a. Chief Minister bill putluh, House a pass aia sorkar tih thil dang a awm thei lo a, Chief Minister in a hmalaknaah hian midang dem tur zawng lovin mawh la ngam rawh se a ti a ni. Mizo Hmeichhiain mi tupawh pasaloh neiin khawi hmunah pawh, state dang leh ram pawnah pawh awm se Mizo a ni reng ang a ti a. Mizo danah Mizo hmeichhiain pasalte hnam an tawm ngai lo, a ti bawk.*

*MPCC Secy Pi Meriam L. Hrangchal pawhin, 'The Mizo Marriage and Inheritance of Property (Amendment) Bill, 2026' hi ngaihtuah chiang leha hnukkir vat turin a ngen tih vawiina Aizawl Congress Party Political Session ah hian a sawi a, Ram hruaitu lu ber tih tur chu a tu leh fate kuahkhawm a ni a ti a. Hmeichhia in pasal a neiin a pasal te nen thisen inzawmna engmah a nei lo a, an fate ah chauh thisen inzawm an ni a, inthen rualin an hrang nghal a ni a ti.*

*Mizo hmeichhia Mizo nia thlamuang taka awm thin te kha rilru na in an awm mek tih sawiin Pi Meriam-i chuan heng hmeichhiate hian sorkar ah engmah beisei an nei lo a, ram hmangaihtute an ni a, an hnam nihna chu tu inlaksak theih nge tiin a zawt a ni.*

*Hetihlai hian Dampa bialtu MLA Dr R. Lalthangliana chuan tunhnaia Assembly Session kal meka Mizo Marriage & Inheritance Amendment Bill 2026 chungchanga Mizo hmeichhe hnamdang pasal neite Mizo-na a bo ang a Chief Minister Pu Lalduhoma'n a sawi chu dik tawk lova a hriat thu Akashvani News Aizawl zawhna chhangin, a sawi a, mihringte chu thisen atanga inthlahchhawng an nih angin Mizote thisen pawh Mizo thisen a ni reng a ti a, Mizo Marriage & Inheritance Amendment Bill 2026 khawilayah mah khan Mizo hmeichhe hnamdang pasal neite Mizo nihna bo tur ang zawnga ziak a awm lova a hriat thu a sawi.*

(Hruaia Aizawl PTC)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



MPCC

Mizoram Pradesh Congress Committee President Pu Lal Thanzarnan Sairang rel station a bazar nê siam tum chu tha an ti lo tih sawiin, Bazar nê siam a nih chuan 'hnamdang sumdawna nê' an siam dawn tihna a ni ati.

Vawiina an Party Political Session ah thusawiin MPCC President chuan kar kalta Thawhtanni a Chief Minister -in Assembly House session-ah 'Sairang rel station-ah bazar nê siam tum a ni' tih chu tha an tih loh thu sawiin Mizoram pawisa luanralna nê a ni ang a ti a. Mizo chawhmeh lei turin state pawn mi te an lokal khawm dawn lo va, chawhmeh leh bungrua, thawmhnaw zawrh tur an rawn keng lut teuh dawn a. Sumdawna a inchimralna tur kawng pakhat a ni thei bawk a ti a. Mizo sumdawngte tan a tha lo a, mahni thlai thar zuartute tan a tha lo bawk a. Sorkar hian ngaihtuah nawn se, a ti.

(PR)



ZMC

Falkawna Zoram Medical College & Hospital-a Obstetrics & Gynecology leh Anaesthesia department te tangkawp chuan Chibawm bawk kg 33 vela rit chu, hlawhtling takin an zai a. Hei hi ZMCH-a zai tawhah chuan lian ber leh a rit ber nia hriat a ni.

Manipur Churachandpur Dist a cheng Kum 40-mi Pi Pinglalmawii chuan pum puar leh insawiselnate neiin ZMC ah hian a inentir a, tun thla ni 21 khan admit a ni a, doctor ten an enchian hnuah chibawm bawk a nei tih hriat chhuah a ni a, vawiin khan zai a ni ta a ni.

ZMC Obstetrics & Gynaecology Head of Dept. Prof Dr Vanremmawii, Prof Dr Lalrinfela, Anaesthesia Asst prof Dr Israel Lalramthara leh an thawhpui team ten darkar khat leh a chanve vel zaiin, he case hautak tak hi hlawhtling takin an zai a, Dr Lalrinfela chuan kum 20 kalta chhunga bawk nasa ber ni a an hmuh thu a sawi a ni.

Tunah hian damlo hi ICU ah enkawl mek a ni a, ngaihtuahawm lutuk lova ngaih a ni a, investigation te pawh tih chhonzawm leh zel tur ni a thudawn a ni.

(Hruaia Aizawl PTC)

